

Et andò do parte, una de sier Polo Nani, sier Hironimo da chà da Pexaro consieri, et li Avogadori che . . . sia fato un soler sopra una barca de Padoa, et posto questo tristo, eridando per uno comandador la sua colpa fino a Oriago, et li sia dà in man de officiali de Padoa, qual conduto, siali taià la testa et brusato. Et questa ave 5 balote.

Et sier Lunardo Emo el consier, sier Jacomo Gradenigo cao di XL, sier Piero da chà Taiapiera qu. sier Elltor et sier Bertuzi Valier vicecai messeno che mercore, poi nona, a dì 23 de l' instante, sia conduto per canal, eridando la sua colpa, et smontato a Santa Croce, sia conduto per terra a la coa de un cavallo, in mezo le do colone a San Marco, dove sopra uno soler sia . . . et poi squartà. Ave 26 balote, et fu presa; et 4 fo non sincere.

Item, asolseno quel de Friul ch' era bandito de terre et lochi, qual sier Alvise Barbaro hessendo locotenente, et presentà in le forze era per decapitarlo in quel' ora, quando el disse, lo dirò solo al mio confessor, niun altri el sa, scrisse a l' Avogaria et fo suspeso, et hozi de tutte le balote è sta assolto.

Item, quello presentò costui al locotenente per esser assolto era in bandò di la Patria . . .

In questa matina, al loto, vene fuera el boletin de 7 cope d' arzeno dorade, poste per ducati 1000 a sier Vincenzo de Prioli qu. sier Lorenzo, è proveditor al Sal, ricco et non ha fioli.

82 *Renga fata in Quarantia Criminal per sier Giacomo da Canal avogador di Comun che menò il prete quando revelò la confession et fo squartado, fatta a dì 16 marzo 1532, da poi disnar.*

Novum genus, nova forma. delicti, Sere-
nissima Signoria et praestantissimi viri.

La nova forma del delito se die punir con nova sorte de suplicio, perchè, signori eccellentissimi, hozi depende da la vostra iustitia over la ruina over la salute de tuto el mondo. Et cussi, come la divina Maestà el exè quei dodese idiota che predicassero la fede, aziò el mondo credesse che la fede perveniva da Cristo, il qual la aveva messa in quei dodese descalzi et non da loro, cussi come ha eleto mi più infimo subdito de Vostra Serenità ad exponer questa importantissima materia, ben prego Sua Divina Maestà che *concedat mihi dicendi modum, retinendi capacitatem et interpretandi subtilitatem*, aziò possa exprimer questo caxo, perchè

come ho dito, signori, hozi se trata de la salute de tutto el mondo. De quanta importantia sia el revelar de la confessione è ben notorio a cadauna de le Vostre Signorie. Bisognava altro inzegno, altra facundia, elegantia et fianco ad exponer questa cosa, de quello è nel vostro servitor.

Signori!

Romani colebant summopere hanc religionem, quam iste proditor olim presbiter violavit. Se 'l se scapolasse la vita a questo, luteriani se glorierano, el Papa ne haria grandissimo despiacer et *demum* tutto el mondo, et se 'l non se trovasse chi squartasse questo traditor, el Papa con li cardinali butati via li rochetti loro medemi *propriis manibus* lo squarteriano. Quando questo traditor sarà menado in piata per Canal grande, bisogneria menterge questi versi da driedo: *Discite iustitiam moniti et non timec divos, at sperate Deum memores fandi atque nefandi.* El caxo nostro è questo, come mò intenderano le excellentie vostre, el qual se io non exponerò con quela eloquentia et gravità che bisogneria la passion dil caxo atroce, sarà mia causa, ma poi le Signorie Vostre per sua bontà suplirano a quanto harà mancato el vostro servitor.

Del 1531, di Novembrio, in la vila de Toregia, uno Zan de Daniel da Cremons, che per homicidio pensato fato in Udene era stà bandito di terre et loci *cum* taglia, vene a star in Padoa che niun el conosceva per esser passatj molti anni dil suo exilio et se aconzò con uno. Hor, stando *in articulo mortis*, come quello che 'l voleva purgar el so delitto, come quello che 'l voleva morir ben disposto, mandò a chiamar questo prè Zuan Piero, dal qual se confessò, et li manifestò el suo homicidio per lui fatto za tanti anni in Friul, el qual peccato mai questo meschin lo havea ditto a persona dil mondo, nè in confession l' havea fato, nè in altro modo, et hora lo disse, credendo confessarse a Dio et non a questo scellerado ribaldo, et donò a sto traditor ducati tre per le messe de San Gregorio che 'l dicesse per l' anima sua. Subito questo traditor de la fede de Christo trovò uno bandito et li disse: *quid vultis mihi dare et ego eum vobis tradam.* Tandem, romaseno d' accordo in lire 100 de pizoli, et inteso el nome dil bandito, cavò el suo bando di questo Zan di Daniel, et lo apresentò al locotenente di la Patria dil Friul, il qual lo scrisse al podestà de Padoa di questo et che dil bandito facesse iustitia. Et preso el vechio preditto, posto a la corda, confessò il delito, dicendo non haver mai